

JACOBI JACOMETTI
DISSERTATIO RHETORICA

Ad Pronunciatum Aristotelis:

Rhetorica refertur ad judicium:

Lib. II. Rhet.



PATAVII MDCCCXXXIII

Typis Seminarii:

Superiorum Permissu:

D I C E N T I B U S :

ET si nata liberaliter & honeste ars dicendi, ut cetera omnes quae appellantur ingenue: attamen non ita est nata, ut a cætu hominum semota procul, quasi quadam pudica nurus, secreta in intima domus parte, conspectum multitudinis evitaret. Ipsi voluere parentes, ut pene prostaret, facilis aditu, & omnibus obvia, togato, tunicato, militi, pagano, remigi, bubulco: iret quocumque & quacumque exultim: neque autem jactantius iret, quam frequentia media; cum venditatione & ostentatione sui tanta nusquam, quanta in concilio celebri, conferto foro, concione astuante, senatoria, forensis, concionalis; apta curia, apta subselliis, turba apta, ubique audita, ubique exaudita, ubique tanquam lena sui, blanda hominum conciliatrix, funderarum voluntatum artifex, affabilitate, gravitate, sapientia, omnium & animorum & rerum in civitate domina potens. Hoc esse illam ingenio, & quare sit, Tullius docet: ceterarum, inquit, ^{a de Orat.} artium studia fere reconditis atque abditiis e fontibus hauriuntur: dicendi autem omnis ratio in medio posita, communi quodam in usu atque in hominum more & sermone versatur: ut in ceteris id maxime excellat, quod longissime sit ab imperitorum intelligentia sensuque disjunctum; in dicendo autem vitium vel maximum sit a vulgari genere orationis atque a consuetudine communis sensus abhorreere. Sensus hic com-

munis, ad quem debeat dictio omnis accommodari, et intelligentia popularis, in quam oporteat dicentium industriam collimare, facit ut omnes sese huc immisceant, et putet quilibet sibi concessum judicare sententia sua. DISSERTATIO hac, quam scriptam causa vestra, Viri Dicentes, dono vobis, speroque uni-verso fore ordini non inutilem, spectat et tendit horsum, ut ostendat, quantumcumque jus tribuat et potestatem quantalibet judicandi eloquentia, populo facta et destinata, ut eum ducat et regat: non fas certe cuivis de populo esse, induere leonis exuvium, et larva judicis vos territare. Agite prospere.

^a Arist.
1.1. rhet.





Semper visa res difficilis multique negotii, verba facere in coetu hominum, ut accedere timide soleant dubitanterque etiam multa doctrina usuque longo confirmati; cur ita visa, causa non una est, illa in primis, quia ratio loquendi conventu frequenti, judicalem formam imitata, cogit pertimescere eadem fere, quæ rei citati, subituri iudicium, pertimescunt. Metum hunc ipsa necessitate imperatum, insuper leges rhetorum sancivere, præcipientes, ut, si quempiam teneret fiducia tanta sui, ut timere noller, sive etiam non posset; nihilominus timeret vel invitus, aut artis proditor haberetur. Ergo nugari libet? imo ipsum nugari & ineptire, quædam cata sapientia est: ubi sollicitudo, simulata juxta ac vera, facit dicentem amabilem laude pudoris, & opinio verecundiæ, quoquo modo collecta, vires addit eloquentiæ mirum quantum. Nam pro more ingenii humani comparatum & hic est, ut homines libenter sentiant, & cum voluptate audiant, se illos esse, quorum conspectum gravitatemque, tanquam censoriam notionem quamdam,

(VI)

pallentes aliqui trementesque reformident. Aut ergo ignoramus, quæ ferat aura secunda provehatque famæ oratoriæ velificantem; aut unde commodè adspirat, inde captanda: si, quos penes arbitrium est, ut vel disertus videre vel infans, hi plane intelligant, spem exitus omnem in sua maxime facilitate & lenitate collocatam; in studio autem, facultate & apparatu, quo quis veniat instructus & ornatus, tantam opem inesse, quantam inesse ipsi voluerint. Habeant id sane qui Auditores sedent, &, ultro nobis concedentibus, habeant: *“ nam rhetorica refertur ad iudicium*: quippe in causarum genere quolibet is, qui audit, iudex est. Sicut autem apud iudices, quorum in potestate est, acerbe vel humaniter decernere, non oratione omnia, non causæ momenti agi solent, sed plurima precibus, squalore, & sordibus; ut, quæ alibi fierent indecore, eadem adhibita ad subfellia iudicum, sint identidem una salus periclitanti, non adhibita perniciem afferant, stante constantia pro vitæ culpa, & animo excelsa pro crimine contempti iudicii: item qui in multitudine dicturus est, hunc auditoribus, iudicibus suis, honorem tribuat, ut, vitatis vitiis abominandis, confidentia, temeritate, improbitate, arrogantia, & sollicitus surgat, & colore mutetur, & periculum intelligat: quæ si non accident, etiam simulanda erunt: monet Quintilianus ^b rhetorum summus. At enimvero, quando seu iudicium appellamus conventum quemlibet auditorum, sive iudicio simillimum; ac tanquam æstimatores & arbitros omnes

^a Arist.
l. 2. rhet.

^b lib. 12.
c. 5.

omnes habemus, quotquot adfunt oculis animis-
 que conversis in stantem unum, sententiam la-
 turi tabella libera, faventem vel adversam: est
 profecto, est, quod & nos dari nobis, præsertim
 a bonis, neque spernentibus leges æquas, jure
 nostro postulemus. Si enim judicia, rem in ci-
 vitate gravissimam, non attingunt promiscue o-
 mnes, neque tractant temere, sed rite & ordine
 delecti legibus judiciariis, severissime constituen-
 tibus, ex quo genere hominum, qua ætate, quo
 censu, quales, & quam probatos deligi oporteat
 eos, qui in alios inquirent, capite, fortunis, di-
 gnitate laborantes: quidni videatur multo æquissi-
 mum, nostros quoque judices non ante in album
 quasi referri decurarique, quam veluti a præto-
 re jurato lectos in judices, optimum quemque,
 ad certas leges & determinatas virtutes sedulo
 examinatos & expensos? Quatuor sunt potissi-
 mum, quæ communiter requiruntur in illo, qui
 judicium administret, sine quibus idoneus judex
 non est: ut sapiens sit: ut prudens: ut procul
 ab amore vel odio: usu tandem nonnullo exer-
 citatus. Pleraque hæc auctore Platone. Neque
 plura neque pauciora, sed omnino totidem se-
 cum afferat, quicumque statuatur de aliena indu-
 stria, deque aliena literatura sententiam dicat.
 Sapientiam hic habeat: sit prudenti ratione præ-
 ditus: sit animo affectus ut oportet: expertus et-
 iam sit: intercluso ad munus difficillimum iis
 aditu, qui aut propter inscitiam ignorant, quid
 deveniat in judicium; aut imprudenter tristes
 ac rigidi, non funguntur officio judicis apti; aut

a Gorg.
 12. de le-
 gib. 4. de
 rep. ali-
 bi.

quos non finit esse integros & incorruptos animus perturbatus ; aut quibus denique , propter nunquam tentatam aleam hanc , objici non injuria potest : ^a carpere vel noli nostra , vel ede tua : verbo uno , longe summotis , si qui non prorsus tales sint , quales universos & singulos vos intueor , quos hæc maxime necessaria ornamenta collecta simul præbent judices cum omnibus , tum verendos mihi præcipue : sicubi autem non contingat habere vestri similes ; næ ego , non seditiosus aliquis , deque turba homo turbulenterum , sed literati defensor populi custosque juris publici , voce quam contentissima excito in literaria republica Gracchos , Glaucias , Drusos , Cottas , alios curatores acres vehementesque rei judiciaræ , suafor rogatorque , ut ferant ad populum quamprimum de nova forma judiciorum ; adimant potestatem prave utentibus , alioque transferant : & ad inflammandam compertis criminibus judicum præsentium invidiam , reos etiam omnium opinione damnatos comparo , quibus ob rem male judicatam diem dicant , anquirentes capitis.

Sapientiam cum dico , non illam intelligo , quam qui teneat , hunc maxime , hunc vere sapientem nominamus , complexionem velutique congeriem exaggeratam omnium aut plurimarum disciplinarum , quæ sint in uno eodemque prorsus homine : hunc enim proprie & nominatim vocat Aristoteles : ^b & sapientem virum vult omnia scire , quoad ejus fieri possit , & quousque omnia scire fas est homini : eundem præterea non

^a Mart.
lib. 1. 92.

^b Meta-
phy. 2. c.
2.

(IX)

non facilia tantum scire, quæque in promptu sunt & obvia passim; sed difficillima, remotissima, & vulgo impervia, eaque sic explicate, ut nihil addubitet; &, quod perfecte scientis indicium est, docere eadem alios possit, eorumque causas tradere & explanare. Longe vero minus sapientiam significo, quam Plato ^a ait congruere soli Deo: affirmatque unum Deum vere sapientem esse, homines vero oportere dici philosophos: idemque Aristoteles sentit ^b, laudans jure Simonidem, cujus est dictum: Sapientiam Deo relinquendam esse, non homini tribuendam. Non ago cum iudicibus nostris importune: non postulo, quæ non humanæ rationis virtus est: ago remisse: ne tantam quidem flagito, in hominem quanta cadit: libens sino, non omnia scire iudices, quæ scire tamen possunt homines: sint disciplinæ & facultates, in quibus ne ipsi quidem negant esse se hospites & peregrinos: largior plurima ignaviæ humanæ, aut si ignaviæ gravantur nomen, pusillis ingeniis plurima largior. Quin etiam ex doctrinarum comprehensione latissima, unde sapientia coalescit, si calleant perquam pauca, conniveo: nam me Plato ^c monet, qui, duo

^a Phædro.

^b Proemio Metaphy.

^c De Legib. 4.

A 5 no-

notas ; at est in quo deficere te, vel ego vel alii notant : latent me plura ; at neque tibi patent omnia : qui autem reprehendat alios , in quo ipse reprehenditur , hunc , non dicam judicem , sed feras hominem ? Ostentas pulchra nomina mille : tu rhetor , tu poeta , tu scrutator naturæ , tu theologus , tu jurisperitus , tu , quod somnias , es : assensere tui ; cirratorum centum monstraris digito ; laudant congerrones ; popellus stupet . Hoc excute totum , seu potius totum te excutiant illi , quibus cor est : quantulum est , o sodes , aut si nimium familiariter te compello , quantulum est , o judex , quod intus habes ? Sed neque id indignor , qui jam institui neque omnia , neque multa in censoribus nostris desiderare . Pergo lenitius agere . At videor audire : o iste , qui patronum te professus causæ communis , sapientiam adhuc extenuas , prævaricaris : quare aut cede jure toto , aut persequi aggressus , contende naviter . Ego vero neque prævaricator sum : multum abest : & sapientiam injungo , non subtilissimam illam quidem absolutissimamque , quam nihilominus sapientiam appellat ^a ingenii doctrinæque facile princeps ; docetque , & Phidiam sapientem lapidum sculptorem ; & Polycletum sapientem statuarum fictorem , & quemlibet in ea arte , cujus peritissimus est , sapientem vocare nos , nihil aliud per sapientem , quam artis virtutem significantes : inde ab Homero ^b Margitem illum , insigni stultitia nobilem , ineptissimum hominum , & insulsissimum , dici fuisse , non fossorem , non aratorem , non sapientem ad aliquid . Caveo , ne judices

^a Ethic. I.
6. c. 7.

^b in
Marg. de
quo Plato
in Alcibi.
po-
ster. &
Hor.

dices nostri Margites sint: veto eos carere sapientia, quam Plato ^a nominat *sapientiam ex parte*: ^a in Theag. Theæt. Suid. in verbo *σοφία*.
 saltem intelligant & comprehendant id quod judicant: ni parent, eos recuso; & subfortitione dignitati consilii causæque consulo. Quid enim magis contra morem, quid magis perverse fiat, quid cum periculo magis existimationis alienæ, quam si disceptent qui non percipiunt, decernant qui non cognoscunt, audiant qui non sentiunt ne illud quidem, quod audituri, disceptaturi, decreturi, grandi fortasse supercilio, conveniunt? Atqui, ut in iis, quæ veniunt sub aspectum, artis labore & imitationis ingenio assimulata, error accidit, si quis, quod videt, non novit, quid illud sit, neque potest rectum a pravo in pictura dijudicare; ut qui non habet cognitum corpus hominis, non figuram, membra, singulorum collocationem, colores, lineamenta, formam, quod sit animal, ignorabit; & inducet facile alius ad credendum, hominem esse simiam, si etiam simia ignota ei sit: sic in illis, quæ mente percipiuntur, falli eum ac decipi necesse est, qui non ante didicerit, quid illud sit, in quo se putat & prædicat verum cernere. Omnino ad rem nostram Aristotelis monitum ^b: ^b Eth. 1. c. 3.
 quisque judicat bene quæ novit, eorumque est bonus iudex. Fit attamen, Auditores, nescio quo malo morbo fit, ut, cum alibi, qui inscientiæ sibi conscii sunt, non audeant ferre iudicium de rebus incompertis, ne risum debeant, audeant hic, & indocti doctique arrogant sibi passim, quantum volunt, in dicentes arbitrium. Cogni-

(XII)

tas alias artes qui non habet, silentio fatetur incertitiam: coram medico tacet theologus: jurisperitus non vexat astrologum: causidicus de ventis non garrat in navitam: nihil centonario cum unguentario: tonsori nihil cum sutore: peritis pax est ab imperitis: in miserum vero dicentem hi omnes, & agmine facto opiliones, pollinctores, falsamentarii, balathrones, & si quid frugis infeliciores terra fundit. Quam vero fastidiose moroseque suspendunt omnia naso! Non arridet inventio cæcis: dispositionem vellicant tenebricosi: non sapit elocutio glandibus assuetis: contra stylum effutiunt, qui, dispeream, si & quid stylus, & in quo stylus, & unde stylus, quæ explicantes solertissimi anguntur rhetores, isti unquam intellexerunt, aut unquam intelligent, nisi si massa informis & dura ferventi aheni imposita recoquatur: quasi autem homunculi nos sciamus, quid sit latine loqui; etiam latinitatem trutinantur, qui neque vigilias agitatae in ea comparanda ostendere possunt, neque magistros commemorare, a quibus latine didicerint, neque libros exhibere, quos duces secuti sint; nisi si fortasse male feriatos aliquos, rejecta præsemina, meramque loquacitatem, sordidam lutulentamque: in quod genus, tanquam publice noxium, ut novam quæstionem decernant optimi reges, spe magna expectamus. Ergo, quo dixi modo, iudices nostri sint sapientes: at iidem, quo modo dicam, sint prudentes.

Prudentiam non commentitiam, ante inauditam, aut hinc alienam excogito, sed in omnibus judi-

judiciis pervagatam, longe celebrem, & a qua non recedant judices, nisi ab officio declinent, amabili nomine, rationem boni & æqui (imo ipsum judicium viri boni est & æqui) non ad severitatem & durtiem, sed ad humanitatem facilitatemque referentem omnia, infestam tristitiæ, acerbitati inimicam, proclivem ad benigne ignoscendum, clementerque veniam dandam. Hanc prudentiæ sive partem sive facultatem, multis explanat ^a is, quem docentem audire neminem unquam poenituit: de quo mentio crebra vobis, viri consultissimi, doctissimi Professores, tradentes ^b tum ex Paulo, tum ex Ulpiano, tum ex Constantino Imperatore; in omnibus quidem, maxime tamen in jure, æquitatem spectandam esse: placere in omnibus rebus præcipuam esse curam æquitatis: judicem æquitatem rerum semper debere ante oculos habere. Quæ sive æquitas, sive prudentia humaniter interpretatur; judicat mansuete; multa sæpe condonat imbecillitate humana peccantibus, neque ubique irascitur: sunt delicta; quibus velit ignovisse: non maculis offenditur omnibus, quas aut incuria fudit, aut humana parum cavit natura; quæ ita non potest undequaque vitium effugere, quantamcumque diligentiam adhibeat, ut non labores interdum lapsa imprudenter aut viribus destituta. Quod si inducant animum nostri judices non probare, nisi quod cunctis partibus sit expletum; in quo autem desit aliquid, hunc fastidire & respuere: aut natio nostra est animosa supra vires, si confidat præstari ab se posse, quod post conditum

^a Eth. 6.
c. 11.

^b ad l. in
omnibus
91. D. de
reg. Jur.
l. placuit
8. C. de
Judic. l.
quod si
Ephefi.
D. de eo
quod cer-
to loco.

ge-

genus hominum nullus ; quamvis in suo genere solertissimus , potuit unquam , ut perfectissime faceret omnia : aut si ab dicente id illi flagitant obstinate , ut nunquam culpetur ; immitius ipsi nobiscum agunt , quam nos egerimus cum iudicibus nostris , dicta sapientiæ lege , quæ tolerabilis esset . At enim , quod jure laudetur , nihil in eo potest arripi ad reprehendendum . Non inficior , si agatur summo jure . Sed , ut nascimur homines , non qui nullis , sed qui minimis urgetur , probatissimus est . Exigenti superstitione , nemo homo est factus ad unguem . Quod igitur Græcorum adagionibus circumfertur ^a : nil est hominum , quod carpere nequeas : & : felix per omnia nullus est mortalium : & : omnibus galeritis oportet cristam inesse : & : omnibus malis punicis granum inest putre : id prope necessario usuvenit in dicentibus . Quantumvis licet excellant , tamen suis veluti clauduntur finibus : feliciter asurgentes in pluribus , deficiunt in aliis : ad hanc usque diem nullius eloquentia tam beata reperta est , quæ non potuerit esse beator ; cui si est quod desit , ne beata quidem putanda est . Dulcis , friget exanguis ; grandis , plerumque fatiscit ; summissa , vilescit ; elata , cothurnos interdum aptat infantibus ; brevis , sese implicat ; numerosa , redundat ; mollem languor , invenustas virilem comitatur . Est ^b quod arguatur ubique etiam in illis , quos heroica vetustas apud omnem posteritatem quasi religione quadam consecravit . Homerus , omnigenæ sapientiæ fons , videtur quibusdam delirus in multis . Demosthe-

nes ,

^a Ex Menan. apud Plutar. l. de Tranquil. animi : apud eundem in Timoleonte : & Laer. in Crat. & Arist. 2. thet.

^b Leon. Allat. de error. magn. Viror. in dic.

nes, pene lex orandi, quo ne Athenas quidem magis Atticas fuisse creditur, alicubi displicet portentosus & insolens: Platonem non puduit interdum esse hominem, visum, in Phædro certe, non divinum: eloquentiæ patrem Isocratem, in compositionis captando consensu sugillant, ut anxium frigide: Thucydides pusillus Tullio dictus, & obscurus: musa Attica, Xenophon non abit irreprehensus; cui oratio depressa, & multa narrata perperam obijciuntur: Herodotum, historiæ primum, traducunt, ut fabulosum & nugatorem: Halicarnasseum notant, ut in phrasi novanda audacem, perversum, & tortuosum. Criticos minime effugit, non dicam mussitantes, sed exagitantés insectantesque is, a quo ornatæ illustratæque doctrinæ omnes; tanquam capitalium criminum compertus, trioboli homo, alienorum sarcinator, rhapsodus putus, & id genus convicia si qua alia, proscissus laceratusque, Aristoteles. Non passi sunt incolumem (qualem quantumque, o Superi!) quem toti Græciæ opponimus, Tullium, alte eminentem omnibus, quoscumque tempora præterita protulere, & ventura proferent: namque & asiaticum, & tumidum, & fractum Calvus, & Brutus detexere: ne dicam eadem ferula vapulasse, quo illustriores, eo a plagosis petitos acrius, in suo utrumque genere principem, & Maronem, ut nullius ingenii minimæque doctrinæ, & Livium nostrum, ut verbosum in historia negligentemque: ut non longe abfuerit, narrat Tranquillus^a, quin ex^a in Calig.
omnibus bibliothecis scripta eorum & imagines
Cæ-

Cæsar Caligula amoveret. Putare malint alii factum id contra hos, & plerosque cæteros livore quodam & rabie sæviendi, & debacchandi in literarum gloria celebres. Nullus repugno, modo contentes habeam, quod tertium proposui; & invidiam, & simultatem & superbiam, & pestes istiusmodi alias, effodere iudicibus oculos, iudiciumque pervertere.

Odium, & amor submoveatur hinc. Qui enim vel malevolentia sit exulceratus, vel obtebratus benevolentia, vel perturbatus impeditusque aliter; negat qui semper audiendus ^a, posse hunc assequi veritatem, habere in consilio prudentiam, juris norma aliqua, & iudicii formula judicare. Si ad laborem igitur incredibilem dicendi tolerabiliter: quis enim nitatur ad admirabile illud vix ulli concessum? si ad tantam morositatem delicatorem, quorum ad gustum ita condire, ut placeat omnibus, ne ille quidem poterit, qui apponat Athenæi ^b placentam, arte culinæ arcana confectam desudatamque; quam tamen hic ut frigidam, ut calidam hic, alius ut nimis dulcem contemnet: si, inquam, ad has difficultates & fastidia, cor accedat felle suffusum, & luridum inimicitia; ad postremum si factiosorum improbitas, & maledicentissimorum in sui dissimiles conjuratio, astu, & calumniis inter tribules sordidos accusatio composita, & domi ornata damnatio: si hæc; Terentianum ^c clamo, remque conclamo: actum est, ilicet, peristi. Hinc viris eloquentissimis exitus quidam non expectati; hinc illæ nunquam satis deploratæ que-

^a Arist.
rh. 1.

^b lib. 14.
Deipno.

^c Eunuch.
Act. I. sc.
1.

querelæ: jacent strenui, vincunt inertes: laudan-
 tur mali, boni deridentur: qui regnum meruit,
 eum fortuna destituit; immeritum evexit ad re-
 gnum hinnitus equi: auribus Jovis digna locu-
 tis barduli quidam palmam eripuerunt, quorum,
 si sapimus, quæso, chartas unctas mittamus Iler-
 dam. Invitus, quod sequius sit, de Græcia lo-
 quor, terra parente & altrice disciplinarum, fer-
 tilissima virtutum, & qua nulla feracior & ube-
 rior documentorum: attamen, quod refero,
 haud boni exempli fuit. Aderat ^a Thebis dies, <sup>a ex Pro-
leg. in
Pindar. e-
ditum a
Schmi.</sup>
 qua die, magno Græciæ conventu, quem res
 nova conciverat, delecti judices gloriam carmi-
 num Lyricorum aut Pindaro, aut Corinnæ ad-
 judicarent. Vatem grandiloquum, profundum,
 sublimem, neque solum, qualem nominant, <sup>b βίπινδ-
μωα πίν-
μωα πίν-
ωτα.</sup>
 equitantem in verbis altis, sed etiam nubium
 tractus æquantem ore magniloquo, vocarat in
 certamen musca Lyrica. Tum ex composito
 itur in jus utrinque: rari & infrequentes Pinda-
 ro adsunt, quem, magnæ virtutis comes, pre-
 mit invidia: versa in Corinnam studia sunt:
 scitulæ, ætatulæ, comptæ lepidule, turmatim
 præsto sunt toti de capsula, venustuli, barbatu-
 li, etiam nugarum nondum obliti, bene barba-
 ti, pars civitatis deterior, sed quæ vincit turbam
 meliorem. Poetiam formosulam circumfundun-
 tur, circumstipant, circumcursant, pro oculif-
 sima trepidant, laborant, anguntur, ambiunt,
 prensant, orant, adstipulatores, subscriptores,
 patroni, omnia, proci Corinnæ suæ. Incum-
 bentem in se molem Pindarus excipit sultus se
 uno:

uno : incendit vires laudis amor , si Pindarus
 Corinnam , at pudor magis , si Pindarum Co-
 rinna superet . Jamque non mora , jussus pri-
 mus , coram judicibus experitur . Quis satis elo-
 quendo sit ? Audissetis grandem , elatum , admi-
 rabilem spiritu , magnificentia , ornatu , rerum
 verborumque copia beatissimum . Sive deos ,
 deorumque progeniem , reges canit timendos im-
 perio , sive quos Elea palma evehit ad Deos ,
 pugilem equitemve dicit ; sive Diis amicum fas ,
 justitiam pietatemque monet ; sive bella impia
 cum Superis , & obrutum ruina queritur nefas ;
 sive miseris inimica plorat & acerba fata mor-
 talibus ; seu vires , animumque , moresque au-
 reos educit in astra : fervet ^a Pindarus , ritu flu-
 minis , lapides adesos , stirpesque raptas , & pe-
 cus & domos volventis una , non sine montium
 clamore vicinæque sylvæ , cum fera diluvies
 quietos irritat amnes : terror æmulaturis , cer-
 tum exitium æmulantibus . Æmula tamen stetit
 audacter Corinna contra , orsa ex adverso puti-
 dulum nescio quid . Poemation certe memorat
 Coelius Rhodiginus ^b ex Corinnæ officina cre-
 ditum , de pisce pompilo , quem nautæ existi-
 mant selem marinum , cujus mentio apud Pli-
 nium . ^c Quid autem prohibet ne opinemur ,
 tunc etiam in certamine , & de pisce , & de
 turture , & de passerulo , & de calathis , &
 de florculis , & de corollis lusisse puellariter :
 ad apinas tricasque argutulam stridulamque ,
 minutulas quasdam sententias , leves frigidas-
 que figuras , balbis verbis , palatoque tenero
 sup-

^a ex Hor.
 Ode 2. lib.
 4.

^b Lest.
 Ant. lib.
 12. c. 12.

^c lib. 9.
 cap. 29.

supplantatis , inani garrulitate fuisse locutam ? Non abhorret a verisimili , si quando memoria hæreret , interea dum tardantem expectat , aut suspexisse lacunar , aut motu in numerum pertentasse pulpiti extrema , aut insititios flavos ad calamistri leges explorasse , aut lænam hyacinthinam permulisse , aut ineptisse aliter , modo faciei sudorem linteo abstergentem , modo nares purgantem , tum interdum onychem specularantem : conjecturam sequor haud vanam , Corinnam visam dicere aliquid dum nihil diceret , publicam clepsydram fefellisse : cum interea , quibus est aurea & animula , strepunt secundo murmure ; qui autem verum amant , juvenesque senesque , non tenent magnos rhonchos , fannamque sonantem . Euge , o Pindare , euge : boni victoriam non dubiam gratulantur ; laurumque Delphicam non votis , sed voce spondent . Interea iudicibus tabellæ dantur , nomen inscribitur , feruntur , conjiciuntur in situlam , numerantur : præco renuntiat , incredibile dictu ! Corinna vincit ^a . In causa iudicii prope centumviralis , ab iudicibus fortasse juratis , se caste integreque iudicatu-
ros , si monstra hæc : videatur magno Mureto minus novum , corruptissima sæpe iudicia ab animis depravatis amore vel odio nunc in hominem , nunc in gentem , profecta fuisse . Indignatur ille ^b quidem , exitisse duos viros Hispanos , cæteroqui & in primis eruditos , & scriptis editis nobiles , quorum alter Lucanum Virgilio , alter Martialem Catullo anteponere veritus non sit , Hispanum suum utrum-

^a Fuisse formosissimâ scribit Pausanias in Bæot. l. 9. De hac victor. vide Ælian. lib. 13. c. 25. Plut. de glor. Ath.
^b Epist. ad Torqu. Bembum.

trumque ; at in quo succenset , ipse peccat , iniquior & maledicentior , quam oportet , in Martialem censor , homo Gallus . Ubinam gentium , obsecro , & propter studium non favetur deterioribus , & propter odium non obtestatur melioribus ? ubi & pro Hispano Hispanus , & Gallus pro Gallo , & pro Italo non pugnat Italus , re pertinaciter gesta , sine nullo grassandi inimice , propeque hostiliter ? Præter modum admirator suorum cum externorum contemptu Belga est : qui nobis aut objicit Alpes , ne transgrediamur , quasi nihil jampridem sit bonarum artium ex nostra Italia , aut transgressos jubet ire tacitos , verecundos , clingues tanquam puerulos ad minitantem magistrum ; unumque inclamat audientem Scaligerum suum : quem ipsi turgidi ampullantesque & natum ad miraculum & gloriam ævi sui , & Auctorum ^a veterum genium , & regem literatorum , & numen literarum , & deorum genus , attoniti stupentesque consalutant , inflantes utrem . Judices etiam ita depravatos contaminatosque repudiamus : aut jurent idem , quod

^a Lipsius passim , præfer. in Epist. ubi de Scaliger .

^b ex Arist. rhet. ἀνευ πᾶσθιν .

Areopagitæ ^b præconis voce imperabant dicentibus , se sibi imperaturos , ut in posterum sine affectibus . Pariter , atque rejecti hætenus , displicent rejiciendi , judices inexperti .

Uso nullo exercitati , nullaue experientia præditi occupant injuste locum judicis in dicentes . Cum in omni functione muneris , tum vero in judicio exercitationem usumque requiri , constat ex Platone ^c : ut inexercitatus & inexpertus nihil possit obire laudabiliter , quin etiam mul-

^c 9. De repub.

multa errare necesse sit. Antiqua sunt hæc, & nemini ignota: quem tandem qualemque usum nostris auribus inculcas hic? illum, quo aliquando & tempestates expertus, & in periculosis versatus, & luctatus cum difficilibus, non hæc ignoret. Prodierit nonnunquam iudex; vocem aliquo tempore ruperit; non domi semper latitarit, ferens ex tuto dicentibus leges. Bellum nunquam experti horrent faciem belli: at mihi inæstuat præcordiis mascula bilis in censores, lingua una in dicentes paratos, cætera ignavos: sicuti sustineo ægerrime, si qui, cum castra nunquam viderint, neque visuri fortasse sint, strenui modo in circulis ocioforum, interque patinas & pocula bellatores: tamen militandi rationem præscribunt in ipso martis discrimine constitutis, & discincti, crepidati, desides, proponunt signa ducibus, quæ sequantur; mittentesque in expeditionem, dicunt itinera, loca, & tempora: sta miles; perge miles; male hac, bene illac; hæc supera juga; trana flumina hæc; illam urbem oppugna, abstine hac; conflagre; cane receptui; collige vasa: quidquid autem aliter atque ipsi, plerumque comessabundi, censuerunt, factum sit; imperatores, legatos, primipilos accusant; rodunt, vellicant illi, quos pertenuis armorum crepitus, & forte oblatu gladiatorum fulgor, anhelos retroagit, & semianimes, ad latibula recurfantes; tunc sentientes demum, esse ridiculos belli iudices, qui nunquam ab umbra discessere. Hi tamen objecta periculi fuga, exprobrataque laboris inertia non absteriti,

riti ; nihilominus adsunt præsentī animo , & præfractē defendunt : se quidem talem aleam nunquam tentasse , solitos e terra spectare naufragia : sic primā ætate , seu perversitate temporum , seu parentum culpa , seu bonarum artium tædio fuisse institutos , ut non putarent turpe nescire : non vacasse ædepol , aut etiam non libuisse diutina docentium opera , longa studiorum assiduitate , meditandi constanti mora , animum sic informare , & mentem ita exacuere , ut facultatem ullam exercerent : veruntamen , quamvis infantissimos , varrones , rupices , & eosque mutos , ut , ex M. Varronis proverbio , neque my facere audeant ; sciantque neque natare , neque literas : tamen jus inveteratum sibi esse , iuste & legitime concessum , in possessione inviolata perpetuo retentos , potestatem in dicentem habere , & de sexcentis judicare . Si percontare , de quibusnam , per hominum fidem ? Vindicamus , ajunt , arbitrium examinandi , inquirendique ad amussim rhetorum , ponentium in magno discrimine hæc , etsi inobservata sapientibus , aut neglecta veluti frivola ; at quæ utique animadvertit , & ut gravia non condonat natio crassa , anxia ad dicentem custodiendum , & plusquam lyncea ad rimandum , sit ne vox hominis candida , ane fusca ; exilis , an clamorosa ; purgatæ fauces , an asperiores ; ecquid appareat ex cura & opera phonscorum : os speciosum sit , an invenustum : quæ ratio gesticulandi ; uno ne digito , an duobus : quæ standi forma ; utrum dextro porrecto pede , an sinistro : rectius
in

in partem hanc, an in illam toga fluat : inquirere sagax , debeat ne iterum componi comam , turbatam sudario siccante frontem : sit ne in capillo barbave inconditum aliquid & inelegans , an omnia pulcre modulateque : curiosa attendere , an argute didicerit , dum dat in principio moram cogitationi , laticlavium concinnare , contemplari pyropum , caput mulcere digito , infringere articulos , simulare conatum , fateri sollicitudinem suspiratione , solemnia scite periteque facere ex artis * mysteriis reliqua. Non in-^{a ex Quin.} debita sibi poscunt. Pronuntiationem dividunt ^{lib. 10. c.} ^{3.} artifices eloquentiæ in vocem , & gestum : vox ad auditum pertinet , gestus ad oculos. Audiunt autem , & vident brutæ animantes ipsæ ; quamquam quod vident & audiunt , non intelligunt , quia rationis expertes. Quando non prorsus ratione carent iudices hi ; faceremus acerbe , si ne illud quidem , quod sedeat in auribus , & quod in oculis , non satis discernere , suspicaremur . Liberum ergo illis sit quærere & in hæc omnia ; prætereaque & in pravum nasum , & in crura distorta , & in calvitium , & in gibberem , in laryngem siccam spumofamve , ravim , tussim , pituitam , excrementa , quibus dispiciendis iudicandisque gloriantur unice . Sumant libertatem quantamcumque volunt , tantummodo , ne ultra crepidam : alioqui iudices sunt , non solum abjiciendi , sed etiam ut abortivi porriciendi .

Jam vero neque cum his , neque cum aliis iudicibus nostris ante conveniet concordia bona , quam pure & sine fraude jurent in leges
judi-

judiciarias, imprecati sibi vehementem vim earum, si quod jurarint, non etiam faxint. Edimus jam perscriptas: non opus trinundino, ubi nihil popolare promulgatur. Comitibus his, ipsum Amphictyonum confessum dignitate superantibus, in hæc verba rogamus: Viri literatissimi, sæpe subire soliti literarium judicium cum illa fortuna, quam vestri judices malint vos habere; velitis, jubeatis, nullam post hanc diem esse in vos potestatem insipientibus, inhumanis, contaminatis, inexpertis? velitis, jubeatis, qui ex hac die de numero vestrorum judicum convictus noxiæ fuerit, poena damnari noxiæ pari: insipientem, & ita mente caligantem, ut quod audit, non magis sentiat, quam calo & cacula sambucæ modos, deportari in exilium ad Cimmerias tenebras: inhumanum, duro flagello castigantem errata, quibus æqui & boni parcere solent, radentemque usque ad vivam cutem, trudi ad inferna Rhadamanto assessorem: contaminatum & injustum, amore, vel odio aliave cupiditate corruptum, excoriari vivum, corioque detracto tribunal inferni, monumentum sefuris: in arenam qui nunquam descenderit, dumtaxat semel aut per viatorem arcessi, aut tergiversantem per lictorem rapi, & unco impacto pertrahi ad experiendum? Ite in suffragium: diribitores secernite. Centuriæ cunctæ, Uti rogas, jusserunt.